

## CHARTA DE VALORS DE L'ASSEMBLAA OCCITANA

### *occitan vivaroalpenc*

L'Assemblaa Occitana es una associacion que vòl far liam entre los actors que trabalhan per avitar la vita occitana e mai vòl èsser un ostal comun per aquel mond. Puei que vòl recaptar las valors que se pòon exprimir dins aquel teissut de vita puslèu qu'afortir las que li serián pròprias, l'Assemblaa Occitana s'empara sus un sòcle minim de valors partejaas.

I - **Respècte de la persona umana.** L'Assemblaa Occitana es pas compatibla amb las ideologias que nègan lo prètz universal de la vita umana. Tota pensaa, tot voler o tot fait de discriminacion, de negacion dels drechs umans, de racisme, de misoginia e d'omofobia non pòirà pas ges èsser tolerats per l'Assemblaa Occitana. Ja deuràn èsser extremats en defòra de l'associacion.

II - **Defensa de la libertat e de la democracia.** L'Assemblaa Occitana es estachaa de fons als principis dels drechs collectius, a l'ideal democratic e a las libertats individualas e fundamentalas de la persona umana. Ges d'entrava a aquelas valors serà toleraa dins l'associacion.

III - **Reconeissença d'una realitat occitana.** L'Assemblaa Occitana es una associacion en lenga occitana per l'espècia de l'occitanitat (los trachs lingüistics, culturals o politics que pertòchan l'occitan). Los que nègan o desconèisson l'existéncia d'aquela occitanitat non trobaràn pas en l'Assemblaa Occitana un ostal. E mai, puei que l'Assemblaa Occitana recapta mai d'una concepcion de l'occitanitat, ela i vei un subjècte politic. E aquel engatjament politic es assumit per l'Assemblaa Occitana.

IV - **Esperit de consens.** La pluralitat de sicaps e d'opinions, de còps las brejas, son lo jòc normal d'un moviment coma l'occitanisme e l'Assemblaa Occitana o vòl pas negar. Totun, l'amira de l'Assemblaa Occitana es d'ajuar al trabalh comun e a la convergècia dels actors en favor de l'occitanitat. Per tant, es pas un luòc ont chalha agusar de diferéncias d'opinions mas un luòc de recèrcha de consens. Non s'espèra pas que los actors qu'intran dins l'Assemblaa Occitana sián d'acòrdi amb tot e amb totes los autres sòcis, sonque que respècten l'Assemblaa Occitana coma eschaença de s'encontrar e d'aprestar de projèctes comuns.

V - **Dobertura.** L'Assemblaa Occitana vòl aculhir de mond d'originas diferentas e de còps tractar amb de gents estrangieras a l'occitanisme. Tolerància intèrna e pedagogia extèrna, si que son de valors nòstras.

VI - **Lo voler.** L'Assemblaa Occitana vòl recaptar primier d'*actors* de l'occitanitat —mas se substituís pas a aqueles actors— e espia vèrs l'accion. La fam d'obrar per la vita occitana es l'arsec que nos incita. Tot sòci de l'Assemblaa Occitana participa als enjòcs de societat segon las siás capacitats e promòu tostemps las valors de l'occitanisme.

VII - **Actitud.** Tot sòci de l'Assemblaa Occitana se compòrta d'un biais respectuós e s'absten de tot acte immoral.

En signant aquesta charta, ieu sossignat/aa, \_\_\_\_\_  
(nom d'ostal, prenom) m'engatjo a n'aplicar lo contengut. E sio conscient/a qu'en cas de non-respècte de la charta, me pòon prepausar de mesuras correctivas e pòo far l'objècte d'una exclusion de l'Assemblaa Occitana.

Luòc:

Data:

Signatura: